

Powšitkowne WOZJEWJENJA

njedźelu, 25. junija 2017

Duchowna hudźba w Budyšinje

W Budyskej tachantskej cyrkwi swjateho Pětra zaklinči njedźelu, 25. junija, we 18.00 hodź. chórowa hudźba pod heslom „Marija.Hudźba.Meditacija“. Spěwatej chór Drježdžanskeje katedrale a chór Lipšćanskeje propstowskeje wosady pod cyłkownym nawodom Matthiasa Liebicha. Na piščelach zahraje Friedemann Böhme. Zastup je darmotny, wo kolektu so prosy.

Putnikowanje džěci do Różanta

Džěci ze wšitkich serbskich wosadow su pod heslom „Wěra je mi dar“ srjedu, 28. junija, na putnikowanje do Różanta přeprašene. Boža mša započnje so w 10.30 hodź. w hnadownej cyrkwi. Po mjezyprogramje so putnikowanje z nyšporom w 13.00 hodź. zakónči.

Džakna Boža mša w Nowej Wjesce

Składnostnje 400lětneho wobstaća Noweje Wjeski wotměja so tam štwórtk, 29. junija, we 18.30 hodź. při wjesnym křižu džakne kemše. Wšitcy zajimcy su wutrobnje přeprašeni.

Zetkanje Częstochofskich putnikow

Tež lětsa pozbudža farar Beno Jakubaš, so w serbskej skupinje na putnikowanje z Warszawy do Częstochowy podać. Hić smě kóždy sobu, kotryž je 18. žiwjenske lěto docpěł. Termin putnikowanja je wot 5. do 15. awgusta. Zajimcy njech so hač do njedźele, 2. julija, pola fararja Bena Jakubaša w Radworju přizjewja, telefonowe čisło (0 3 59 35) 2 07 13. Zetkanje wšitkich putnikow budže wutoru, 4. julija, w 19.30 hodź. w Radworju na farje.

Za putnikowanje do Krupki so přizjewić

Młodostni wot 16 lět su přeprašeni, wot njedźele, 23. julija, do Krupki putnikować. Woni nawróca so pjatk, 28. julija. Přizjewić měli so zajimcy hač do pjatka, 30. junija, w Chrósćicach na farje, telefonowe čisło (03 57 96) 80 400. Putnicy zetkaja so njedźelu, 2. julija, po nyšporje w Chrósćicach na farje, štož je za wšitkich nowačkow winowatosć. Nyšpor započnje so w 14 hodź. Putniska Boža mša w Krupce budže srjedu, 26. julija, w 10 hodź.